



Reykjavík, 8. júní 2026  
SFS22040100

Borgarráð

## **Viðmið um hámarksfjölda reykvískra grunnskólanemenda sem heimilt er að greiða framlag vegna til sjálfstætt starfandi grunnskóla utan Reykjavíkur**

Óskað er eftir að sviðsstjóra skóla- og frístundasviðs verði heimilað að setja viðmið um hámarksfjölda nemenda með lögheimili í Reykjavík sem heimilt er að greiða framlag vegna til sjálfstætt rekinna grunnskóla utan Reykjavíkur skólaárið 2026-2027. Viðmiðið verði eftirfarandi:

Waldorfskólinn Lækjabotnum	70
Alþjóðaskólinn á Íslandi	40
Barnaskóli Hjallastefnunnar, Garðabæ og Hafnarfirði	8
Grunnskólinn NÚ, Framsýn	10

Ákvörðun um viðmið verði tímabundin og gildi til 1. júlí 2027, fyrir þann tíma verði tekin ákvörðun um framlengingu eða endurskoðun á fyrirkomulaginu. Með samþykkt viðmiða um hámarksfjölda er ekki fallið frá óskilyrtum rétti sveitarfélagsins til að synja einstaka umsóknum foreldra um skólavist í grunnskóla utan lögheimilissveitarfélags. Gerður er fyrirvari af hálfu Reykjavíkurborgar um að fjárveitingar skóla- og frístundasviðs eru gerðar með fyrirvara um fjárheimildir skv. fjárhagsáætlun á hverju ári.

Á grundvelli framangreindra viðmiða er óskað eftir að gerður verði þjónustusamningur við tilgreinda grunnskóla, í samræmi við meðfylgjandi drög.

### **Greinargerð:**

#### *I. Forsaga málsins*

Á fundi borgarráðs, þann 26. júní 2025, var lagt fram bréf sviðsstjóra skóla- og frístundasviðs, dags. 6. júní 2025, sbr. samþykkt skóla- og frístundaráðs frá 23. júní 2025 varðandi tillögu um viðmið um hámarksfjölda reykvískra nemenda sem greitt er framlag vegna til sjálfstætt starfandi grunnskóla utan Reykjavíkur skólaárið 2025-2026. Í öllum tilvikum var ákvörðun tímabundin til 1. júlí 2026 og fyrir þann tíma skyldi tekin ákvörðun um framlengingu eða endurskoðun á fyrirkomulaginu.

Frá árinu 2016 hafa viðmið um hámarksfjölda reykvískra nemenda í sjálfstætt reknum grunnskólum utan Reykjavíkur verið ákveðin árlega en hingað til hefur ekki verið gerður samningur um fyrirkomulagið.



## II. Helstu ákvæði laga um grunnskóla og reglugerðar um sjálfstætt rekna grunnskóla.

Í 43. gr. a.-f. laga um grunnskóla nr. 91/2009 er fjallað um sjálfstætt rekna grunnskóla.

Til samræmis við 1. mgr. 43. gr. a í lögum um grunnskóla er kveðið á um að sveitarfélag sem skóli starfar í skuli gera þjónustusamning um rekstur skólans við rekstraraðila. Samningur felur í sér samþykki sveitarfélags fyrir stofnun skólans, staðfestingu á rétti til fjárframlaga skv. 43. gr. b og skuldbindingu sveitarfélags um að hafa eftirlit með starfi hans.

Í lögum um grunnskóla er ekki gert ráð fyrir að þjónustusamningur sem staðfestur er af mennta- og barnamálaráðuneyti sé gerður milli viðkomandi sveitarfélags og viðkomandi grunnskóla og á sveitarfélagið ekki aðkomu að málum er varða innritun, gjaldtöku eða skólagöngu barnsins, með sama hætti og ef sjálfstætt rekinn grunnskóli er staðsettur í sama sveitarfélag og viðkomandi á lögheimili í. Á hinn bóginn hafa sveitarfélög almenna heimild í 100. gr. sveitarstjórnarlaga nr. 138/2011 til að gera samninga við einkaaðila um framkvæmd þjónustustarfsemi sem þeim er lögum skylt eða heimilt að sinna.

Samkvæmt 1. mgr. 7. gr. reglugerðar um sjálfstætt rekna grunnskóla eiga grunnskólar sem eru reknir af einkaaðila á grundvelli laga um grunnskóla og þjónustusamnings við sveitarfélag sem hlotið hefur staðfestingu menntamálastofnunar/mennta- og barnamálaráðuneytis, rétt á framlagi úr sveitarsjóði til starfsemi sinnar vegna nemenda sem eiga lögheimili í því sveitarfélagi sem skólinn starfar og vegna barna sem ráðstafað hefur verið í fóstur til fósturforeldra, sem eiga lögheimili í sveitarfélaginu. Sama gildir um grunnskóla sem þegar eru starfandi á grundvelli viðurkenningar ráðherra, en sveitarfélagi er þó heimilt í þjónustusamningi að takmarka framlag úr sveitarsjóði við hámarksfjölda nemenda. Þá getur Reykjavíkurborg takmarkað hámarksfjölda nemenda við skólann sem sveitarfélaginu ber að greiða kostnað af, sbr. 7. tl. 43. gr. a laga um grunnskóla, með hliðstæðum hætti og sveitarfélag sem sjálfstætt rekinn grunnskólar starfar í.

Samkvæmt 2. mgr. 7. gr. reglugerðar um sjálfstætt rekna leikskóla gildir í þeim tilvikum þegar barn sækir sjálfstætt rekinn grunnskóla utan lögheimilissveitarfélags skulu lögheimilissveitarfélag og viðtökusveitarfélag gera með sér samning á grundvelli 5. gr. grunnskólalaga áður en barn er innritað í viðkomandi skóla. Viðtökusveitarfélag hefur þá sömu skyldur gagnvart skólavist barnsins og ætti það lögheimili þar. Um framlag úr sveitarsjóði í slíkum tilvikum fer með sama hætti og vegna annarra barna sem sækja skóla sem reknir eru af sveitarfélögum utan lögheimilissveitarfélags.

Gera verður ráð fyrir að sveitarfélagi sé heimilt á grundvelli framangreinds lagaákvæðis í grunnskólalögum og stjórnarskrárvarins réttar sveitarfélags til sjálfstjórnar samkvæmt 78. gr. stjórnarskrár Lýðveldisins Íslands, sbr. lög nr. 33/1944, að takmarka fjárframlög sín til sjálfstætt rekinna grunnskóla utan sveitarfélagsins en tekjustofnar sveitarfélaga skulu ákveðnir með lögum, svo og réttur þeirra til að ákveða hvort og hvernig þeir eru nýttir, sbr. einnig 1. gr. og 2. mgr. 8. gr. sveitarstjórnarlaga nr. 138/2011.

Við það er miðað að sama framlag verði greitt til sjálfstætt rekinna grunnskóla utan Reykjavíkur og gilda skv. 8. gr. reglugerðar nr. 1150/2018 um sjálfstætt rekna grunnskóla. Í 1. mgr. 8. gr. kemur fram að framlagið skuli nema að lágmarki 75% af vegnu meðaltali heildarrekstarkostnaðar allra grunnskóla sem reknir eru sveitarfélögum



í landinu á hvern nemanda samkvæmt árlegum útreikningi Hagstofu Íslands. Gildir þetta hlutfall fyrir skóla með allt að 200 nemendur, en framlagið skal vera að lágmarki 70% fyrir hvern nemanda umfram þann fjölda.

### *III. Sjálfstætt starfandi grunnskólar á höfuðborgarsvæðinu*

Með tölvubréfum, dags. 19. maí 2026, óskaði skóla- og frístundasvið eftir upplýsingum frá neðangreindum sjálfstætt starfandi grunnskólum um fyrirhugaðan fjölda reykvískra nemenda á skólaárinu 2026-2027 og athugasemdum ef einhverjar væru við að halda hámarksfjölda reykvískra nemenda í skólanum óbreyttum frá þessu skólaári. Einnig var þeim afhent drög af þjónustusamning og þeim gefið tækifæri að koma með athugasemdir ef einhverjar vegna hans.

#### **Waldorfskólinn Lækjarbotnum**

Skólaárið 2025-2026 stunda 54 reykvískir nemendur nám í skólanum en viðmið um hámarksfjölda reykvískra nemenda sem heimilt var að greiða framlag vegna skólaársins 2025-2026 var 74.

Með tölvubréfi, dags. 19. maí 2026, til skólans var upplýst að til stæði að hafa fyrirhugaðan fjöldi reykvískra nemenda á skólaárinu 2026-2027 54. Með tölvuskeyti frá skóla dags. 22. maí 2026 var óskað eftir frekari skýringum á lækkun fjölda. Með tölvuskeyti skóla, dags. 27. maí 2026, var upplýst að það stefndi í að allt að 62 reykvísk börn myndu sækja skólann á komandi skólaárinu og var óskað eftir að tillagan yrði endurskoðuð. Með tölvuskeyti dags. 4. júní 2026 var upplýst að ný tillaga myndi miða að því að fjöldi reykvískra nemenda á skólaárinu yrðu 70. Með tölvuskeyti skólans sama dag voru ekki gerðar frekari athugasemdir.

Lagt er til að viðmið um hámarksfjölda reykvískra nemenda sem heimilt er að greiða framlag vegna á skólaárinu 2026-2027 verði 70 nemendur.

#### **Alþjóðaskólinn á Íslandi**

Skólaárið 2025-2026 stunda 29 reykvískir nemendur nám í skólanum en viðmið um hámarksfjölda reykvískra nemenda sem heimilt var að greiða framlag vegna skólaárið 2025-2026 var 50 nemendur.

Með tölvubréfi, dags. 19. maí 2026, til skólans var upplýst að til stæði að hafa fyrirhugaðan fjöldi reykvískra nemenda á skólaárinu 2026-2027 verði 35 nemendur. Með bréfi dags. 26. maí 2026 undirrituðu af Hönnu Hilmarsdóttur skólastjóra kom fram að við skólann á því skólaári sem væri að ljúka hefðu verið að jafnaði 32 nemendur frá Reykjavík og að nú þegar hefðu 29 nemendur frá Reykjavík skráð sig við skólann fyrir skólaárið 2026-2027. Lagði skólinn því til að viðmiðið yrði ekki undir 45 nemendum í það minnsta en best væri að halda við núverandi viðmið um 50 nemendur.

Lagt er til að viðmið um hámarksfjölda reykvískra nemenda sem heimilt er að greiða framlag vegna á skólaárinu 2026-2027 verði 40 nemendur.

#### **Barnaskóli Hjallastefnunnar í Garðabæ og Hafnarfirði**

Skólaárið 2025-2026 stunda 2 reykvískir nemendur nám við Barnaskóla Hjallastefnunnar í Garðabæ og Hafnarfirði en viðmið um hámarksfjölda reykvískra nemenda sem heimilt var að greiða framlag vegna skólaársins 2025-2026 var 8.



Með tölvubréfi, dags. 19. maí 2026, til skólans var upplýst að til stæði að hafa fyrirhugaðan fjöldi reykvískra nemenda á skólaárinu 2026-2027 verði 8 nemendur. Með tölvuskeyti dags. 26. maí 2026 frá Ölmú Guðmundsdóttur framkvæmdastýru Hjallastefnunnar ehf. var upplýst að engar athugasemdir væru frá Barnaskólanum í Garðabæ og Hafnarfirði vegna tillögu um fjölda nemenda.

Lagt er til að viðmið um hámarksfjölda reykvískra nemenda sem heimilt er að greiða framlag vegna á skólaárinu 2026-2027 verði óbreytt eða 8 nemendur.

#### **Grunnskólinn NÚ, Framsýn**

Skólaárið 2025-2026 stunda 3 reykvískir nemendur nám í Grunnskólanum NÚ, Framsýn. Núverandi viðmið um hámarksfjölda reykvískra nemenda sem heimilt er að greiða framlag vegna skólaársins 2025-2026 er 20 nemendur.

Með tölvubréfi, dags. 19. maí 2026, til skólans var upplýst að til stæði að hafa fyrirhugaðan fjöldi reykvískra nemenda á skólaárinu 2026-2027 verði 10 nemendur. Með tölvubréfi dags. 19. maí 2026 frá menntastjóra NÚ, var erindið mótttekið en engar athugasemdir bárust um tillöguna.

Lagt er til að viðmið um hámarksfjölda reykvískra nemenda sem heimilt er að greiða framlag vegna á skólaárinu 2026-2027 verði 10 nemendur.

#### **IV. Fyrirvarar og gildistími**

Tekið er fram að með samþykkt viðmiða um hámarksfjölda er ekki fallið frá óskilyrtum rétti sveitarfélagsins til að synja einstaka umsóknum foreldra um skólavist í grunnskóla utan lögheimilissveitarfélagsins. Gerður er fyrirvari af hálfu Reykjavíkurborgar um að fjárveitingar skóla- og frístundasviðs eru gerðar með fyrirvara um fjárheimildir skv. fjárhagsáætlun á hverju ári.

Í öllum tilvikum er lagt til að ákvörðun um viðmið verði tímabundin vegna skólaársins 2026-2027.

#### **V. Upplýsingar um fjárhagslega áhrif**

Áætlaður árlegur rekstrarkostnaður á hvern nemanda í grunnskólum, sem reknir eru af sveitarfélögum, var kr. 3.364.131 í maí 2026, samkvæmt tölulegum upplýsingum frá Hagstofu Íslands. Miðað við að greitt sé 75% af þeirri fjárhæð er árlegur rekstrarkostnaður á hvern nemanda kr. 2.523.098 (dreifist á níu mánuði, september til maí).

Miðað við fyrirbyggjandi upplýsingar er erfitt að tilgreina væntan fasta kostnað Reykjavíkurborgar pr. nemanda. Hann er mismunandi eftir skólum. Sá kostnaður fellur ekki niður ef laus pláss eru til staðar í grunnskólum í Reykjavík. Breytilegur kostnaður ræðst af því úr hvaða skólahverfi væntanlegur nemi í sjálfstætt starfandi skóla kemur.

Fjárhagsáætlun skóla- og frístundasviðs vegna framlaga til sjálfstætt starfandi grunnskóla miðast við nemendafjölda þeirra að hausti á rekstrarári á undan þ.e. október 2024 vegna fjárhagsáætlunar 2025. Skóla- og frístundaráð fær breyttar fjárheimildir í samræmi við fjölgun/fækkun og verðlagsbreytingar framlags á fjárhagsárinu.





## VI. Afgreiðsla málsins

Með vísan til framanritaðs er lagt til að samþykkt verði að setja framangreind viðmið um leyfilegan hámarksfjölda reykvískra nemenda, þ.e. nemenda með lögheimili í Reykjavík, sem heimilt er að greiða framlag vegna á skólaárinu 2026-2027, með fyrirvara varðandi afgreiðslu einstakra umsókna og um að fjárveitingar skóla- og frístundasviðs eru gerðar með fyrirvara um fjárheimildir skv. fjárhagsáætlun á hverju ári.

Virðingarfyllt

Steinn Jóhannsson  
sviðsstjóri skóla- og frístundasviðs

Hjálagt:  
Drög af þjónustusamningi



## ÞJÓNUSTUSAMNINGUR

Skóla- og frístundasvið Reykjavíkurborgar, kt. 530269-7609, hér eftir SFS, annars vegar og [nafn rekstraraðila], [kt. rekstraraðila], hins vegar að [heimilisfang], vegna [nafn skóla], hér eftir skólinn, gera með sér eftirfarandi þjónustusamning um að uppfylla skólaskyldu og greiðslu rekstrarframlags, hér nefnt framlag, vegna nemenda í [nafn skóla] sem eiga lögheimili í Reykjavík og barna sem ráðstafað hefur verið í fóstur til fósturforeldra með lögheimili í Reykjavík:

### 1. gr. Þjónustan

1.1 Skólinn, sem er sjálfstætt rekinn skóli með þjónustusamning við [nafn sveitarfélags], tekur að sér á grundvelli þessa þjónustusamnings að uppfylla skólaskyldur SFS gagnvart nemendum með lögheimili í Reykjavík sem samþykkt hefur verið af hálfu SFS að sækja skólann í stað grunnskóla í Reykjavík.

### 2. gr. Skilyrði

2.1 Það er skilyrði greiðslu framlags SFS að um sé að ræða nemendur með lögheimili í Reykjavík eða um sé að ræða börn sem ráðstafað hefur verið í fóstur til foreldra sem eiga lögheimili í Reykjavík.

2.2 Samþykki SFS vegna tiltekinna nemenda er tímabundið að hámarki til skólaársins.

2.3 Skólinn sinnir að öllu leyti skólaskyldu nemenda til samræmis við skyldur samkvæmt lögum um grunnskóla nr. 91/2008 og reglugerðum settum samkvæmt þeim eða öðrum lögum og reglum. Í þessu felst meðal annars eftirfarandi:

- a) Komið verður til móts við námslegar, tilfinningalegar, félagslegar og líkamlegar þarfir nemenda samkvæmt 2. mgr. 17. gr. laga um grunnskóla nr. 91/2008.
- b) Skólinn tryggir að starfsfólk hafi viðeigandi hæfni og þekkingu til að sinna menntun og velferð nemenda til samræmis við ákvæði laga.
- c) Skólinn aftar og kannar sakarvottorð starfsmanna og tryggir að þeir standist þær kröfur sem leiða af 11. gr. grunnskólalaga.
- d) Starfsemi og starfsaðstaða skólans skal á hverjum tíma vera í samræmi við gildandi lög um grunnskóla nr. 91/2008, með síðari breytingum og lög um menntun, hæfni og ráðningu kennara og skólastjórnenda við leikskóla, grunnskóla og framhaldsskóla nr. 95/2019, með síðari breytingum, reglugerð nr. 1150/2018, um sjálfstætt rekna grunnskóla og önnur lög og reglugerðir sem gilda um starfsemi grunnskóla.
- e) Réttindi og skyldur nemenda skulu vera í samræmi við gildandi grunnskólalög á hverjum tíma, reglugerðir settar samkvæmt þeim og aðalnámskrá grunnskóla auk annarra laga eftir því sem við á.
- f) Starfsfólk skólans skal gæta fyllstu þagmælsku um hagi foreldra og barna þeirra sem það fær vitneskju um í starfi sínu og leynt skulu fara samkvæmt lögum, fyrirmælum yfirboðara eða eðli máls. Þagnarskylda helst þótt látið sé af starfi. Brot á þagnarskyldu getur varðað refsingu samkvæmt almennum hegningarlögum.



- g) Skólinn fylgir ákvæðum laga nr. 91/2008, um grunnskóla og eftir því sem við á ákvæðum stjórnáskólulaga nr. 37/1993 við töku ákvarðana, sem eru kærnanlegar skv. 47 gr. laga nr. 91/2008, um grunnskóla auk þess sem lög um upplýsingarétt nr. 140/2012 geta átt við um starfseminna.
- h) Skólinn fylgir ákvæðum laga um persónuvernd og vinnslu persónuupplýsinga nr. 90/2018 enda telst hann ábyrgðaraðili persónuupplýsinga vegna vinnslu þeirra í starfsemi skólans. Skólanum ber að tryggja að miðlun upplýsinga skv. samningi þessum til skóla- og frístundasviðs sé í samræmi við framangreind lög um persónuvernd og vinnslu persónuupplýsinga.
- 2.4** Um framlagið samkvæmt samningi þessum gilda reglur Reykjavíkurborgar um styrki eftir því sem við á. Þess skal getið á heimasíðu að skólinn hafi gert þjónustusamning við Reykjavíkurborg sem falli undir reglur Reykjavíkurborgar um styrki frá 25. maí 2017, sjá fskj. 2. Skólanum ber að skila skóla- og frístundasviði kyngreindum gögnum um þá sem eftir atvikum veita eða njóta þjónustu eða gæða vegna styrkveitingarinnar.
- 2.5** Með samningi þessum er ekki fallið frá óskilyrtum rétti sveitarfélagsins til að synja einstaka umsóknum foreldra um skólavist í grunnskóla utan sveitarfélagsins.

### 3. gr. Rekstrarframlag

- 3.1** Skóla- og frístundasvið greiðir framlag til [nafn rekstraraðila] að hámarki vegna dvalar [fjöldi nemenda] reykvískra nemanda í skólanum sem SFS hefur samþykkt að fá að stunda nám við skólann.
- 3.2** Framlagið nemur 75% af vegnu meðaltali heildarrekstrarkostnaðar allra grunnskóla sem reknir eru af sveitarfélögum í landinu á hvern nemanda samkvæmt útreikningi Hagstofu Íslands. Framlagið tekur breytingum til hækkunar eða lækkunar eftir útreikningum Hagstofunnar.
- 3.3** Framlag SFS til skólans, sem er framlag vegna reksturs skólans allt árið, verður greitt með 9 greiðslum síðasta virka dag hvers mánaðar fyrir líðandi mánuð. Ekki er greitt í júní, júlí og ágúst.
- 3.4** Framlagið miðast við fjölda nemenda í skólanum í yfirstandandi mánuði, sem eiga lögheimili í Reykjavík og nemendur sem eru fósturbörn, ef fósturforeldrar eiga lögheimili í Reykjavík.
- 3.4** Innifalið í rekstrarframlagi er allur skólakostnaður, sbr. 8. gr. reglugerðar 1150/2018 um sjálfstætt starfandi grunnskóla.
- 3.5** Þarfnist nemandi sérstakrar aðstoðar eða aukins stuðnings sem telst umfram almenns skólakostnaðar skal samið sérstaklega um viðbótargreiðslur um leið og gengið er frá samkomulagi um skólagöngu nemanda milli lögheimilissveitarfélags og viðtökusveitarfélags og/eða skólans. Samkomulag um viðbótargjald skal tekið til endurskoðunar fari annað hvort sveitarfélagið/skólinn fram á það.
- 3.6** Skólanum ber að upplýsa SFS ef nemandi með lögheimili í Reykjavík hættir námi við skólann eða ef ekki er uppfyllt skilyrði um lögheimili nemanda í Reykjavík eða breyting verður vegna fósturbarns fósturforeldra með lögheimili í Reykjavík. Falla greiðslur SFS vegna þess nemanda niður frá þeim degi að telja.
- 3.7** Óheimilt er að taka rekstrarafgang eða fjármuni, sem rekja má til fjárveitinga Reykjavíkurborgar, í formi arðgreiðslu eða öðrum fjárhagslegum ávinningi fyrir eigendur sem ekki tengist rekstri og skólastarfi. Nýta skal fjármunina til að efla skólastarfið. Í ársskýrslu



skólans til Reykjavíkurborgar skal gerð grein fyrir því hvernig framangreindur rekstrarafgangur er metinn og hvernig honum er varið.

#### 4. gr.

##### Upplýsingar, mat og eftirlit

4.1 Skólinn skal lúta sama eftirliti með innra starfi og aðrir grunnskólar en skólinn lítur eftirlit [nafn sveitarfélagsins]. Þeir skulu framkvæma innra mat með því að meta með kerfisbundnum hætti árangur og gæði skólastarfsins með virkri þátttöku starfsmanna, nemenda og foreldra eftir því sem við á.

4.2 Skólanum ber að birta á heimasíðu sinni upplýsingar um innra mat, tengsl þess við skólanámskrá og áætlanir um umbætur.

4.3 Skólanámskrá verður lögð fram árlega, fyrst innan 30 daga frá undirritun samningsins.

#### 5. gr.

##### Endurskoðun samnings

5.1 Ef upp koma breytingar í starfsumhverfi skólans eða SFS er samningsaðilum heimilt að óska eftir endurskoðun samningsins með tilliti til þeirra.

#### 6. gr.

##### Framsal og fjárhagsleg ábyrgð

6.1 Grunnskólanum er óheimilt að framselja samninginn eða réttindi samkvæmt honum til þriðja aðila.

6.2 Jafnframt er óheimilt að veðsetja samninginn eða tengja hann á nokkurn hátt öðrum álíka löggerningi.

#### 7. gr.

##### Force Majeure

7.1 Hvorugur aðili verður talinn hafa brotið gegn samningi þessum þegar honum er ókleift að uppfylla samningsskyldur sínar vegna atvika, sem rekja má til óviðráðanlegra ytri atvika (force majeure), s.s. vegna alvarlegra slysa, stríðsátaka, náttúruhamfara, deilna á vinnumarkaði, fyrirmæla stjórnvalda eða annarra óvæntra og ófyrirséðra atvika, sem samningsaðilum er ekki unnt að fyrirbyggja.

#### 8. gr.

##### Gildistími og uppsögn

8.1 Samningurinn gildir frá upphafi skólaársins 2026-2027 til og með skólaslita í júní 2027 og fellur þá úr gildi án þess að þörf sé á uppsögn.

8.2 Gerður er fyrirvari af hálfu Reykjavíkurborgar um að fjárveitingar skóla- og frístundasviðs eru gerðar með fyrirvara um fjárheimildir skv. fjárhagsáætlun á komandi ári.

8.3 Samningurinn er uppsegjanlegur af hálfu beggja samningsaðila hvenær sem er á samningstímabilinu með þriggja mánaða fyrirvara miðað við næstu mánaðamót eftir uppsögn. Uppsögn skal vera skrifleg.

#### 9. gr.

##### Endurkrafa á ofgreiddu framlagi og vanefndir



**9.1** Komi í ljós að SFS hafi ofgreitt rekstrarframlag af einhverjum ástæðum, t.d. vegna rangra upplýsinga eða mistaka mun SFS lækka rekstrarframlag til skólans við næstu greiðslu sem því nemur eða krefjast endurgreiðslu. Skólinn getur óskað eftir að endurgreiðslu verði skipt á þrjá mánuði.

**9.2** Komi til vanefnda af hálfu annars hvors aðila samnings þessa er hinum aðilanum heimilt að grípa til viðeigandi vanefndaúrræða. Sé um verulega vanefnd að ræða er heimilt að grípa til riftunar. Áður en til riftunar kemur skal send áskorun um efndir innan 30 daga frá því að aðilanum berst sannanlega tilkynning um riftun.

**9.3** Skólanum ber að tilkynna SFS skriflega án tafar ef hann telur vafa leika á að hann geti uppfyllt samninginn.

## **10. gr.**

### **Afturköllun viðurkenningar**

**10.1** Afturkalli mennta- og barnamálaráðuneytið staðfestingu þjónustusamnings skólans eða samningur við [nafn sveitarfélags] fellur úr gildi, fellur samningur þessi úr gildi án uppsagnar.

## **11. gr.**

### **Varnarþing**

**11.1** Komi til þess að mál verði höfðað vegna ágreinings um samning þennan skal það rekið fyrir héraðsdómi Reykjavíkur.

## **12.**

### **Tengiliður**

**12.1** Tengiliður fyrir hönd skólans er [nafn og starfsheiti tengiliðaur]. Tengiliður fyrir hönd SFS er [Nafn og starfsheiti tengiliður]. Tengiliðir skulu leggja áherslu á að koma erindum og úrlausnarefnum fljótt og vel í réttan farveg og hraða afgreiðslu þeirra, jafnframt að skrá og geyma minnisatriði um samskiptin og hvernig hverju úrlausnarefni er lokið.

## **14. gr.**

### **Undirritun**

**13.1** Samningur þessi er undirritaður með fullgildri rafrænni undirskrift í samræmi við ákvæði laga nr. 55/2019 um rafræna auðkenningu og traustþjónustu fyrir rafræn viðskipti og reglugerð (ESB) 910/2014 um sama efni. Með undirritun ábyrgjast viðkomandi einstaklingar jafnframt að þeir hafi umboð til að skuldbinda aðila, með þeim hætti sem samningurinn gerir ráð fyrir.

### **Fylgiskjöl:**

Fskj. 1; Reglur Reykjavíkurborgar um styrki